

# INUIT ATAQATIGIIT INATSISARTUNI



UPA16/114.2  
31. maj 2016  
Peter Olsen

**Uunga siunnersuut: Ilinniagaqarnersiutit pillugit Inatsisartut inatsisaata allangortinnera pillugu Inatsisartut inatsisaat nr. xx xx xx 2016-imeersoq (Ilinniarnep nalaani ernialersuisarnermik atuutsitsilerneq aamma ilinniarnermi taarsigassarsianik akilersuinissamut maleruaqqusanik allanguineq erseqqissaanerlu)**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Aappassaaneerreqarnerani oqaaseqaatissaq:

Naatsumik oqaatigissagaanni immikkoortoq una pineqartoq siullermeerneqarnerata kingorna ilinniartitaanermut ataatsimiisitaliamut ingerlateqqinneqarpoq, ataatsimiisitaliamilu pineqartumi annertuumik oqallisigereerlutigu, amerlanerussuteqarluartut tassalu Siumut aamma Inuit Ataqatigiit isumaqatigiipput oqaluuserisassap pineqartup naammassineqarnissaa suliareqqinneqarnissaalu ukiamut kinguartinneqassasoq, ikinnerussuteqarluni kisimiittoq Demokraatineersoq aamma akuersaaqataasimalluni.

Taamatut kinguartsinissamik aaliangiussaqaarsimanerput ilaatigut tunngaveqarpoq misissorluaqqaarusukkatsigu inatsisissap pineqartup kingunissai ilinniartuutitsinnut qanoq ikkumaarnersut paasilluaqqaarusullutigu.

Nunatsinni Danmarkimilu ilinniagaqartut kattuffiisa Ili Ilip aammalu Avalannerup inatsisissatut siunnersuut tapersersunngilaat.

Tupinnanngitsumik: Tassami inatsisissami nutaami siunertarineqarpoq ilinniartup ulloq siulleq attartorfianinngaaniit ernialersuinerit aallartinneqartalissasut, ullumikkut imaappoq ilinniakkamik naammassinnereernerup kingorna aatsaat ernialersuineq aallartinneqartarluni.

Imaappoq inatsisissap nutaap pilersinneratigut ilinniartuutitta aningaasatigut annertuumik annaasaqatigissavaat; ilinniartuutitta ulluinnarni atugarisaat ajornerulersinneqassapput.

Taassuma saniatigut "neqitsersuilluni" akissarsiassartalersuillunuunniit ilinniakkamik naammassinnipallattalernissamik inatsisitigut siunertalersuiniarneq ilinniagaqartuniit aamma tapersersorneqanngilaq.

"Ilimaginngilarput attartukkaminik isumakkeerfigineqarnissartik anguniaannarlugu ilinniartut ilinniakkaminik piffissaq eqqorlugu naammassinnittartut amerleriarnissaat. Avalakkormiut naapeqatigineranni taama oqarput. "Tamannami aamma pillugu ilinnianngilagut." Avalammiut aamma taama oqarput. Amerlasuut, piffissaq eqqorlugu naammassinninngittarnerannut peqqutaasut amerlasoorpassuusut Avalakkormiut oqariartuutigaat; misilittagaqalerumalluta ilaanni unikkallartarpugut, imaluunniit suliuugaluta ilinniartariaqaratta piffissaq eqqorlugu naammassinissaq ajornakusoorpoq aamma sungiussiniartarnermut piffissaq annertoq atoqqaartariaqartaratsigu. Taama oqarput Avalakkormiut.

Imaappoq ilinniagaqartut kattuffianniit inatsisissatut siunnersuutigineqartoq taperserneqanngilaq, tupinnanngitsumik, atukkamik ajorseriateqarnissaat kissaatiginnginnamikku.

Taamaattumik tamakku tunngavigalugit Inuit Ataqtigiinniit oqaluserisassaq ukiamut kinguartinneqaraluarat assorsuaq nuannaarutigisimagaluarparput.

Kisianni taava aana eqqumiitsortaa imaluunniit tupinnartortaa; tassa taava ukiamut kinguartinneqarnissaanik aaliangereernikooruttortugut, tamanullu nalunaarutigineqareersoq, taava maani ikeriinnarsuakkut ilinniartitaanermut ataatsimiisitaliaq nalakkersuisooqtigiit gruppiisa siulittaasuanniit atsiorneqarsimasumit allagarseriataarpoq; naatsumik oqaatigalugu ataatsimiisitaliarput peqquneqarpoq suliaq una pineqartoq upernaq manna suliaralugu naammasseqquneqarluni ukiamuunngitsoroq.

Kinguninnguutigullu naalakkersuisoq allannguutissatut siunnersu ummik saqqummiussaqaariasaarluni.

Imaappoq; Avataaniit akuliuffigineqariataarpugut. Taamaattoqarneratigullu pissaanerup pingasoqiusatut agguataarneqarsimanera innarlerneqartoq Inuit Ataqtigiinniit isumaqarpugut.

Inatsisartut sulisitsisuunerput inatsisiliortuunerpullu avataaniit qulaaniillu akuliuffigineqariasaarpoq akuliuffigineqartussaananani; ataatsimiisitaliap namminersortuunera illersugaaneralu ataqqineqarani, avataaniit akuliuffigineqarpoq innarlerneqarlunilu. Taamaattoqarsinnaangilaq.

Inatsisartut aaliangersugaat naalakkersuisut suliarisussaavaat, killormuunngitsoq.

Taamaattumik qulaaniit toqqusassineqartut avaararneqarsimasuttullu misiginarpoq akuersaarneqarsinnaangitsoq.

Allaat ima nipeqarsorinarsinnaalluni: Taamaaliunngikkussi pisassarsi pissavarsi.

Naalakkersuinikkut taamatut ingerlatsisoqalersimanera Inuit Ataqtigiinniit aarlerinartutut akuersaarneqarsinnaangitsutullu isigaarput.

Naalakkersuisooqtigiit ikinnerussuteqartut piumasaqaataat naammassipallanniaannarlugu ataatsimiisitaliami amerlanerussuteqarluartut isumaqtigiillutik aaliangigaat, qatangiinnartinneqarpoq. Tamannalu ilinniartuutitta ulluinnarni atugarisaasa ajorseriarnissaannik kinguneqartussanngorluni. Ajorpoq ajorluinnaqqissaarpoq.

Naalakkersuisooqtigiit ajornartorsiornerat avissaartuunnerallu isertorneqarsinnaangitsumik ugguunakkut takutinneqaqippoq uppernarsaqqinneqarlunilu.

Kikkut tamanna akilissavaat? Ilinniartuutitta. Ajoqaaq ajuusaarnarluinnaqqissaarpoq akuersaarneqarsinnaangitsoq.

Taamattumik Inuit Ataqtigiinniit siunnersuutip itigartinneqarnissaa inassuteqaatigaarput.

Qujanaq

Peter Olsen